



JUDICIAL SYSTEM MONITORING PROGRAMME PROGRAMA MONITORIZASAUN SISTEMA JUDICIAL

Komunikadu Imprensa

23 Outobru 2013

Kazu abuzu seksuál hasoru labarik julga barak iha tribunál distritál hotu

Iha 21 Outobru 2013, Tribunál Distritál Díli hala'o leitura akordaun ba kazu krime abuzu seksuál ba menór (labarik) no kondena arguidu ho pena prizaun tinan 10. Kazu ne'e komete husi arguidu RdS hasoru vítima ne'ebé sei iha tinan 6 ne'ebé akontese iha Distritu Dili.

Ministériu Públiku akuza katak iha 19 Maiu 2013, arguidu konvida vítima nia avo mane ba nonton TV iha nia uma no momentu ne'ebá vítima ba hamutuk ho nia avo.

Tanba kalan boot ona vítima dukur no toba, arguidu kous vítima ba hatoba iha ninia kuartu, arguidu komesa loke vítima ninia ropa no lamas iha vítima ninia isin lolon no oin lulik (organ seksuál), derepente vítima hakfodak no hakilar halai sai ba nia avo mane.

Maske nune'e, arguidu mós sai tuir no dehan ba vítima nia avo katak ita toba ona no sira ba toba hamutuk deit ho arguidu no vítima toba iha klaran.

Arguidu deklarata katak wainhira sira toba arguidu nia liman kona fiu no ahi mate, no kontinua repete halo abuzu seksuál hasoru vítima. Arguidu habiit vítima nia kelen rua, kaer no buti vítima nia isin lolon no oin lulik (orgaun seksuál) no hakfodak hakilar no nia avo hader no rasta sai vítima iha arguidu nia kelen let.

“Kazu ne'e hatudu katak presiza kuidadu extra ba labarik sira tanba labarik sira risku ba abuzu iha kuakler momentu no situasaun. Abuzu no violénsia seksuál hasoru labarik iha kualker forma prejudika teb-tebes labarik sira nia dezvoltamentu no sira nia futuru. Tanba ne'e, aleinde asegura kondensasaun aproriadu ba agresor sira, Estadu mos tenke asegura katak labarik sira la kontinua moris iha risku ba abuzu no violénsia seksuál iha futuru,” dehan Luis de Oliveira Sampaio, Diretór Ezekutivu JSMP.

Kuakler aktu abuzu seksuál ba menór hanesan krime ne'ebé sériu tebes, tanba aktu ne'e kontra direitu labarik sira nian atu livre husi forma violénsia oi-oin no afeita teb-tebes labarik sira nia dezvoltamentu fíziku no psikológjiku. Nu'udar Estadu ne'ebé ratifika ona Konvensaun Direitu Labarik, Timor Leste iha obrigasaun atu asegura katak labarik sira hetan protesaun adekuaudu husi forma violénsia saida deit hasoru labarik.

Iha artigu 18 (1) Konstituisaun haktuir katak: *labarik sira iha direitu ba protesaun espesial husi familia, comunidade, nomos estadu, liu-liu hasoru hahalok hotu hanesan la tau-matan, diskriminasaun, violénsia, presaan, abuzu seksuál no explorasaun.*

“Wainhira krime sira hanesan abuzu no violasaun seksuál hasoru labarik sira kontinua akontese, hatudu impresaan katak estadu falla atu kumpri estadu nia dever konstitusionál atu asegura labark

sira hetan protesaun tuir konstituisaun haruka,” dehan Luis de Oliveira Sampaio, Diretór Ezekutivu JSMP.

Iha kazu ne’e, Ministériu Públiku akuza arguidu nu’udar autór materiál ba kazu krime kontra artigu 177 númeru 1 Kódigu Penál kona-ba abuzu seksuál ba menór konjuga ho artigu 182 númeru 1 alinea (a) Kódigo Penál kona-ba agravasaun.

Durante prosesu avaliasaun ba faktus ne’ebé produs iha audiénsia, tribunál prova katak arguidu mak nu’udar autór material ba krime ne’ebé imputa ba nia, tanba ne’e tribunál konklui hodi kondena arguidu ho pena prizaun tinan 10.

Kazu ne’e rejistu iha tribunál ho Númeru Prosesu: 233/2013/TDD. Julgamentu ne’e prezide husi juisa Dra. Jacinta Correia, representa juiz kolektivu, Ministériu Públiku representa husi Dra. Gloria da Silva (Prokuradora Internasionál) no arguidu hetan defeza husi Dr. Cansio Xavier husi Eskritóriu Defensória Públiku.

Atu hetan informasaun kle’an liu tan favor kontaktu:

Luis de Oliveira Sampaio
Diretór Ezekutivu JSMP
Telefone: 3323883 | 77295795

www.jsmp.tl

Facebook: www.facebook.com/timorleste.jsmp

Twitter: @JSMPtl